

**STAVOVI** Objavljena studija o politici Srbije i Hrvatske u regionu

# Zagreb i Beograd gube uplitanjem u odnose u BiH

Glavni „zapadni igraci“ - EU, SAD, ali i Turska, trebaju ostaviti po strani razlike koje imaju u vezi sa BiH, navodi se u publikaciji Basinera i Vebera

Zvanični Zagreb i Beograd mnogo toga mogu izgubiti ako ne igraju konstruktivnu ulogu u Bosni i Hercegovini te je njihova politika prema BiH danas mnogo fleksibilnija nego ranije, navodi se u političkoj studiji „Hrvatska i srpska politika u BiH - pomoći ili smetnja?“ iz pera analitičara Kurta Basinera (Bassuener) i Bode Vebera (Weber).

## Zajednički napor

Ovi analitičari Vijeća za politiku demokratizacije, u studiji, osim utjecaja Srbije i Hrvatske na politiku u BiH, razmatraju i miješanje i utjecaj Turske u odnose na Balkanu.

Kako su naveli u ovoj, tek objavljenoj publikaciji, za BiH će od presudnog značaja biti da glavni „zapadni igraci“ - EU, SAD, ali i Turska, ostave po strani razlike koje imaju u vezi s ovom državom te da se udruže na temelju njihovog zajedničkog razumijevanja o konstruktivnim ulogama Hrvatske i Srbije u regionu. Potrebiti su zajednički napor svih da BiH samostalno krene na svom evropskom putu, zaključuje se.

- Nade među zapadnim dužnosnicima da će susedi



*Basiner: Konstruktivna uloga kao cilj*

moći riješiti problem u BiH definitivno su se raspršile. Ipak, susjadi i dalje mogu igrati konstruktivnu ulogu tako što će imati prave poticaje. To

uvjetno zavisi od toga hoće li Zapad razviti koherentnu zajedničku politiku za BiH - kaže se u ovoj studiji.

Navodi se da je razorna

uloga RS u BiH dugo smatrana najvećim problemom koji je sakatio državu te se zaključuje da će izazivanje Beograda da ostvari svoje mehanizme putem Banje Luke ostati na čekanju.

- Vlastima u Beogradu treba biti jasno da odnosi sa Zapadom direktno zavise i od pitanja suverenitet i teritorijalnog integriteta BiH. Stoga će biti od značaja da posjete novog predsjednika Srbije (Tomislava Nikolića, op. a.) Sarajevu budu češće nego Banjoj Luci - kaže se u ovoj analizi.

## Uloga Turske

Bez obzira na to u kojoj mjeri bili korišteni „specijalni paralelni odnosi“ između RS i Srbije, u ovoj publikaciji ističe se da bi zapadne vlade trebale pritisnuti zvanični Beograd kako se ovi odnosi ne bi naglašavali.

Iako se konstatiра da trilateralni sastanci koje je u posljednje vrijeme organizirala Turska, uključujući Srbiju i Hrvatsku u rješavanju određenih pitanja, za BiH nisu polučili posebne rezultate, u analizi se navodi da bi oni i dalje trebali igrati konstruktivnu ulogu za region.

**A. Du.**